

萬有文庫

第二集七百種

王雲五主編

明詩紀事

(八十)

陳田輯

商務印書館發行

明詩紀事

(八十)

陳田輯

國學基本叢書

明詩紀事卷十

己籤

鄭國賓十三首

國賓字汝嘉蘭谿人嘉靖庚戌進士除婺源知縣徵授兵科給事中改禮科以事廷杖削籍有臥雲堂集

田按汝嘉以趙文華子懌思齋祀停封日請假送父帝大怒戊懌思邊衛以禮科失糾劾汝嘉與都給事中謝江等六人廷杖削籍歸時年三十八自號樸里子汝嘉七言歌行五絕七絕風流跌宕大有古人遺韻

關西老將歌

少年騎馬疾如飛長弓勁箭突重圍萬乘曾推雙轂送五侯揖讓平交歸瀚海黃沙連朔漠天山月白聞邊柝一身轉戰三千里陰風颯颯陣雲惡奮臂前驅斷月支橫行又奪胡馬騎雕戈白日明秋漢大漠霜高響鐵蹕塞下人傳老都護軍前共說長城固豈知歲月漸蹉跎老大逢人不相顧射虎將軍竟不侯牧羝歸來空白頭聞說燉煌徵猛士關西老將淚先流

土兵行

姑蘇城上烏夜啼。姑蘇城下水平溪。黃狼走去白狼逐。土兵攬得蠻兵妻。花巾裹頭白裹腳。勁弩強弓隨部落。盧管鳴鳴夜劫商。搶得黃金充囊橐。海上鯨鯢終可除。中州狼虎不堪居。一朝封豕衝突起。殺人之性還有餘。

金華詩錄嘉靖間東南倭患棘總督尙書張經徵四方兵及狼土兵議大舉趙文華獻平倭七策因遣祭告海神卽察賊動靜文華陰欲攘經之功狼兵稍有斬獲厚犒之使進勦土兵猖獗所由來也初贛州賊作亂都御史陳金奏調廣西狼兵征之季獻吉作土兵行當時情形亦復爾附

聞歌

十二秦箏壓指彈。雲屏步障最相憐。流霞暗度樓前月。散穀明邀瑋瑁筵。羅綺紛紛爭相愛。芙蓉千尺明仙隊。小腰誰復惜瓊枝。乍汎風光上環珮。梁塵暗落起新聲。鬪寵含情滿座驚。眼中粉黛空姝麗。盡道蛾眉恨不平。別有高臺上涼日。朱甍翠幃遙相憶。春風來蕩河陽花。楊柳低纖堪把惜。鴛鴦宛轉金縷函。翡翠玲瓏雲錦絨。華燈忽照珊瑚枕。小婢收將火浣衫。長安貴客金如土。袒臂登堂愛歌舞。當壚快飲三百杯。長江作醅虬作脯。不道今生不解愁。相逢便欲脫吳鉤。殷勤那計百年事。白日聊隨江畔遊。

聞陸錫山掌科落職

造物忽如此。君才獨可憐。風塵餘白首。窮達付蒼天。夜雨燈前草。秋帆渭上船。逐臣應有恨。遲爾越江邊。

縱鹿井序

山人饋余鉅廉。頭角嶢嶢然。毛色純黑。疑千年物也。決籓縱之。侑以四韻。他日相見于瓊玉山頭。須爲余頓轡華陽洞口。

谷口隱深霧。重巖午不分。此間有豐草。好去臥玄雲。樵客醒殘夢。宜春憶舊羣。赤城應不遠。爲我訪茅君。

古別離

江上芙蓉花。一別一回老。看取秋風來。紅顏爲誰好。

古意

海門初日上。照見望京樓。下有北去船。揚帆過石頭。

小園

簾捲風生席。牆低月到庭。豆花棚下坐。一卷種魚經。

柳枝詞二首

白板橋邊楊柳枝。美人樓上勸瓊卮。千條萬縷不堪折。舞翠臨風欲向誰。
水榭風生市地垂。曉粧臨鏡鬪蛾眉。未須展盡黃金色。不與江亭管別離。

邊詞

白骨未收城下土。黃沙又起塞邊風。孤城百戰心猶壯。夢裏還開五石弓。

畫鷹

萬里長風吹雪毛。霜眸歷歷見秋毫。須教平野無狐兔。眼下何人爲解條。

驄馬

驄馬金羈碧玉鞭。玉郎騎坐入幽燕。醉來忽墮青絲轡。又向高樓一夜眠。

徐學謨十六首

學謨初名學詩。字思重。改字叔明。蘇州嘉定人。嘉靖庚戌進士。授兵部主事。改中書舍人。以憂歸。起禮部郎中。出爲荊州知府。以事罷歸。起南陽知府。進湖廣副使。改江西。以右僉都御史巡撫鄖陽。擢禮部尙書。加太子少保。有海隅集七十七卷。春明臺十四卷。歸有園臺二十九卷。

靜志居詩話。宗伯本名學詩。以與劾分宜者同姓名。遂更爲謨。雅負詩名。然多懦響。殆肖其人。

田按。宗伯論詩云。近來作者。纔成數十豔語。如黃金白雪。紫氣中原。居庸碣石之類。自以爲前無古人。小兒效顰。引爲同調。南北傳染。終作癘風。蓋爲學王。李者而發。又謂王元美兄弟詩文皆作秦聲。初閱則驚。細觀則厭。然余閱其全藁。五古趨步晉宋。時有合作。七律猶是李。王成派。七絕流美。頗有俊聲。其才去李。王甚遠。觀其海隅集。自敘云。廩三十年之力。撰於今之作者。猶夢夢也。矧曰古之人哉。自知審矣。宗伯頗好事。在荊州。日招致麋池生輩。引爲上客。又作世廟識餘錄。其語頗覈。此書余得藏之。

仲夏日同田祠部楊白二主客集郊壇道院

端居積煩憂。出門厭塵鞅。茲晨邁休暇。忽起中林想。折簡呼友生。攜樽恣還往。偶依羽士邱。玄宮信幽敞。暫解區中累。果諧心所賞。楊靜山鳥窺。庭虛夏木長。白日銷篆煙。青霞映書幌。當杯析疑義。會意忽抵掌。境悟寂喧齊。安遣神氣爽。翛然洞元化。何似軒皇上。終宴已忘疲。清歌激慨慷。還真如可期。及爾長偃仰。

仲夏望日省僚宴集分韻得併字

燕州鬱徂暑。端居想幽觀。睠茲窈窕宇。扶疏夏木盛。賓筵襲蘭馨。華裾朗玉映。無煩折簡呼。都忘倒屣迎。散吏意俱適。佳晨酌頻命。雖處朝市喧。而有雲林靜。車馬自馳驅。飄埃日紛迸。何如濯素襟。相將發高詠。逍遙聊卜懽。沈冥已中聖。爲謝同心者。幽期稀合併。

遊大慧寺作

塵羈埋素襟。幽遐發深省。物化諒有遷。哲人貴所秉。竭來倦風埃。休期忻合併。矧茲秋氣佳。鞅掌獲暫屏。驅車遵郊陌。雲天恣引領。修途逗叢棘。忽入招提境。躡磴慰冥搜。捫蘿啓幽騁。秋榮麗寒渚。朔吹披霞嶺。爲從火宅來。聊憇空門靜。慧性覺方始。迷津誤已永。未淨皈依心。相睇虛無影。肅駕謝珠林。徘徊延夕景。

徐園訪金伯謙諸友不遇

久知客郊園。炎月阻相訪。茲晨邁新霽。倭風開颯爽。肩輿一乘興。巖扉啓幽敞。山中靜無人。蘿陰滿書幌。坐餘几閣涼。愛此菱蒲長。秋事已如斯。平疇鬱嘉穰。雖乏晤對懽。頗諧素心賞。適去復適來。聊當看竹往。

頭陀生行并序

頭陀生者。故遼藩弄兒。國亡後。祝髮入道。爲襄陽羅者所得。余哀其窮。釋焉。作是篇。

江陵昔日重驪宴。侍兒俱在芳華殿。酣歌那省風愆篇。狎比惟看佞幸傳。是時頭陀生幾年。鬢雲繚繞垂兩肩。宮娥望幸不得前。衆中一身當三千。自謂穠華可長久。狂飆忽集章臺柳。天上纔飛司隸章。宮中已授邪臣首。白馬盟寒帶礪空。黃龍識應狐狸走。六王之鬼餒不脯。曳裾賓客爲鉗徒。頭陀何物么麼者。飛身化作崑崙奴。袖間金錯一匕首。腰下赤羽雙僕姑。禁門躍出青天杳。白日重關失萬夫。往日紅顏堪一擲。行雲過眼湘江碧。黃金散盡舞臺傾。青鬢悞身真可惜。轉盼君恩不到頭。并刀斷送舊風流。欲尋雲外龍堂寺。不覺秋深燕子樓。浮生如露亦如電。流浪年光颯飛箭。傷心莫話囀春鶯。埋骨堪投定惠院。竭來何事逐紅塵。猶是從前一幻身。香飄膩玉侵羅帑。淚決流波溼漢津。紫盂白衲強裝束。伶俜還帶雙蛾蹙。階下低頭望使君。十年前是荊州牧。奏當還識聖恩寬。讞書終貸伶官戮。故國淒涼莫歎嗟。飄零行腳向天涯。縱然未了三生債。更望何門認主家。

齋夜有懷籀冠生宋登春

戍角遙聞城上頭。相思眞擬隔三秋。寒蟬欲斷歲云暮。江葉不飛人自愁。隱幕疏花閒短榻。持杯殘月在高樓。鷺池今夜酒應熟。野白荒荒誰勸酬。

秋日登滕王閣

江島浮空浦樹分。人煙生處俯氤氲。千層白浪帆檣雨。一片青山殿閣雲。簾棟故應留勝概。斗牛猶自護遺文。庾關客思秋無賴。森森汀花雁夜聞。

袁履善有鞏昌之命喜而有述

去日能忘范蠡船。俄聞五馬出秦川。江東秋老蓴鱸後。渭北風高鳥鼠前。今代吐蕃頻款塞。漢家都尉欲臨邊。逢人拂拭新髯色。誰識投沙故少年。

泳飛閣

鳥飛詎能泳。魚泳詎能飛。吾居魚鳥間。川雲澹相依。

梨花

隔汙飄殘雪。隨風拂晚驂。相逢禁火節。江北憶江南。

荊州上元曲時在長安旅舍作

春風初到萬家城。火樹銀花相映明。高結綺樓橫十里。沿街齊唱上元晴。辛酉元夕嘗爲此曲。
雕盤翠幕總繁華。誰似朱城帝子家。雲母屏中輝紫電。珊瑚樹底發流霞。
千花騎擁白雲橋。月淡煙霏溼絳綃。試聽玉壺沈漏水。西宮隱隱出鸞簫。

章華臺迴接沙津。隊伍如雲引路塵。錦障紗籠移鶴輅。香風散作十街春。

田按此數詩述遼邸故事也。

清明日作

黃河東去淨春沙。一曲溪流似若耶。馬上不知寒食過。村村風雨暗梨花。

得江陵諸王書答之

故國園池重別離。敢將雲壑傲明時。如今問我樊川業。恐是前生杜牧之。

劉效祖二首

效祖字仲修。濱州人。嘉靖庚戌進士。除衛輝推官。徵授戶部主事。歷員外郎中。出爲陝西副使。有

雲林臺六卷。

海嶽靈秀集。仲修七絕得盛唐氣格。李伯承之亞也。

靜志居詩話。副使負經世略。坐計吏罷官。晚寄情詞曲。所填小令。可入元人之室。昭陵嘗遣中使索其題冊。呼曰念菴。念菴。副使別字也。因賦詩云。更生雙鬢已蕭騷。敢謂文章擅彩毫。過誤偶承明主問。因緣不是鬱輪袍。都人傳其事。以爲列朝所未有。田按。副使七絕風調俊爽。王阮亭香祖筆記。欲輯其鄉邦前輩明人有集者五十家。而遺副使名。則雲林臺流傳之鮮可知矣。

塞上曲

朔風吹雪渡沙場。傳道單于獵白狼。北望征塵何處是。暮雲無際草蒼茫。

折楊柳

楊柳千條拂地垂。春風宕漾客心悲。誰家年少輕離別。偏把愁聲笛裏吹。

陳宗虞一首

宗虞字于韶。閩中人。嘉靖庚戌進士。累官江西副使。有臥雲樓橐。六亭集。

弇州山人續橐甚矣詩之難言。工事則徘徊而傷情。工情則婉綽而傷氣。氣暢則厲直而傷思。思深則沈簡而傷態。態勝則冶靡而傷骨。于韶爲詩。亡不兼美。

送胡生南歸

扁舟一葉故園心。斗外輕帆認武林。欲採芳蘅何處泊。太湖湖上水雲深。

張四知一首

四知字子畏。汝陽人。嘉靖庚戌進士。除刑部主事。歷兵部郎中。出爲四川僉事。遷副使。有韶亭集。送盧少溪憲副還東陽。

朔風吹野酌。去路沂通津。旅邸相知少。天涯送別頻。青山幾載夢。白舫一歸人。海內塵方擾。君輕避此身。董傳策三首。

傳策字原漢。上海人。嘉靖庚戌進士。除刑部主事。以劾嚴嵩下詔獄。謫戍南甯。隆慶改元。起吏部。

主事歷郎中累遷南大理卿進工部侍郎就改禮部有采薇集四卷幽貞集二卷邕歛集六卷廓然子稟二卷蓮盧稟七卷

四庫總目傳策詩多激烈如其爲人

雲間志略幼海詩文有湘纍長沙之風

松風遺韻抱一山人詩如兩岸青山天外落一帆明月鏡中開落日玄猿嘯峻嶒戍樓清角下寒灘閉戶共沾分歲酒當筵俱是異鄉人蝴蝶夢中江草碧鷓鴣嘯處嶺雲黃天涯作客憐同病人事經秋苦獨吟皆警拔之句田按侍郎以繩下過急爲家奴所殺恣睢者可以戒矣

赴戍過馬頰同吳君時來張君翀作

客行九千里舟過十八灘山疑三峽險水似五溪寒挂纜蒼松杪停橈白石灣路難何足問此地是平安訪客啜檳榔

急腳蠻奴髻半斜客來提榼手雙叉檳榔擊出斑斕片灰白萸青當獻茶邕人以青萸葉白灰和檳榔啜之客至盛榼以獻謂之代茶寄橄欖

波斯薦翠味甘嶺樹秋高拂瘴嵐記得吳都會有賦錫甌密緘到江南邕橄欖最佳名波斯種法用錫甌包之雖寄遠不損

邱橈一首

橈字懋實諸城人嘉靖庚戌進士授行人擢刑科給事中進兵科都給事中以事黜爲民隆慶初

起禮科未至擢南太常少卿進大理少卿以病歸萬歷中起右通政未上擢右副都御史進刑部侍郎拜南吏部尙書贈太子太保諡簡肅

戊辰元夕吳太宰張侍御移尊見過

煙柳三山寺燈花九陌橋年華殊不負春思轉無聊忽聽尙書履兼鳴驄馬鑣高軒曾有賦未便是元宵

黃甲三首

甲字首卿上元人嘉靖庚戌進士除吏部主事謫泰州運判遷東郡監州旋罷歸有鳳巖編年稿二十六卷

顧起元客座贅語盤南詩頗饒獨詣所著獨鑒錄評詩文多前人所未發

烏衣佳話首卿詩陳氏園亭云曲徑沿溪入疏峯帶雨晴春日云鳥聲侵夢斷竹色映階虛秋興云山高月出雁初下水遠天空人自愁天甯寺云短劍孤懸漫夜月敝裘初綴薄秋風

田按顧太初云首卿性好忤物居鄉輿往還者不三二人晚與廖工部文光善數共觴詠一日寥規其集中有陣毯等語宜大刪遂大詬罵絕之今觀鳳巖編年稿拉雜支離如陣毯者多矣所著獨鑒錄卽在編年稿中其彈射古人詩文亦互有得失有四子賢雋伯祖儒著諫鳳巖覺集仲成儒著競辰齋集叔方儒著陌花軒集季復儒著振秀閣集今皆失傳惟成儒詩散見鳳巖稿中如乾坤萬變等蕉鹿英雄一笑齊金瓦又覽鏡漫成慨孤生只幻塵又試問餘春應幾許尊前莫靳歌金縷殊是俊句

臘日寄阮按察

不見風流阮嗣宗向來孤性若爲同歲殘瑤草空相憶夢入深林恐未通隴上梅花還雪色山中竹葉幾

春風欲知此日懷君處。正是東山寒雨中。

題畫

十里修林帶石橋。茅堂背郭隱松濤。故人何地來相訪。共臥白雲山月高。

河亭

孫楚樓前放酒船。秦淮堤上買花鈿。誰家錦幃開新月。百尺危欄水泊天。

王好問三首

好問字裕卿。樂亭人。嘉靖庚戌進士。除太常博士。遷御史。歷大理丞。通政使。遷工部侍郎。改刑部。戶部。進南右都御史。就遷戶部尚書。贈太子少保。有春煦軒集三十六卷。

王崇簡畿輔明詩王公好問詩閒淡得陶韋遺意。

逢樵者

秋雨洗林麓。草色澹寒碧。颯颯風吹衣。泠泠泉激石。偶同樵者行。雲閒意俱適。猿嘯幽谷靜。鶴唳空山夕。微鐘發暝煙。明月送歸客。

休沐

暫從賜沐暇。適出曠遠情。散步出虛齋。坐聽山鳥鳴。疏雨動微涼。纖雲弄晚晴。尋幽涉竹徑。不知新筍生。

道人偶相訪。遺我沖虛經。大道惡多歧。全身貴逃名。真言誠可擇。吾心本無營。

來江亭晚眺

長空湛湛月朧朧。南國江山如鏡中。六代遺蹤何處問。秣陵寂寞起秋風。

方弘靜一首

弘靜字定之。歙人。嘉靖庚戌進士。除東平知州。遷南戶部員外。歷郎中。出爲四川僉事。歷江西副使。進參政。遷廣東布政使。以右副都御史巡撫浙江。罷歸。起撫郢。遷南戶部侍郎。贈工部尙書。有素園存稿二十卷。

新都秀運集。定之抱性幽閒溫秀。故其修詞吐氣。有似於人。若流水不知處。幽禽相與飛。不知春色減。忽見林花飛。永日空山寂。幽蟬時自吟。宛然王孟遺響也。

訪程山人不遇

避喧來谷口。愛此青松陰。永日空山寂。幽蟬時自吟。花源應未隔。蘿徑杳難尋。稍覺塵心豁。方知仙境深。

馮皋謨一首

皋謨字明卿。海鹽人。嘉靖庚戌進士。官刑部郎中。出爲江西僉事。歷廣東參議副使。進福建參政。有豐陽集十二卷。

宿石屋山寺

青天萬仞插芙蓉。迴合珠林翠幾重。秋老荒苔飛葉墮。客來燒芋有僧供。雲啣佛閣金鋪暝。山磴仙壇石髓封。聽法欲尋龍起處。滿空寒瀨夾疏鐘。

陳柏一首

柏字子堅。沔陽州人。嘉靖庚戌進士。授兵部主事。歷郎中。出爲山西副使。有見南江閣詩選九卷。文選十四卷。借山亭前集詩六卷。續集六卷。來青軒詩選四卷。文選八卷。退樂軒詩選一卷。

四庫總目。柏詩頗宕逸有姿。而失於薄弱。

田按。子堅。子玉。叔與七子游。倡和極多。子堅晚始爲詩。亦與七子通聲氣。人比之高十五。子堅有句云。何人曾似高常侍。五十工詩亦善鳴。紀其事也。

送韓生歸吳興兼呈陳陸二丈

憐汝何落魄。栖栖空遠遊。秋風吹櫂葉。遙上九江舟。山連西塞蒼溪水。歸去鱖魚肥且美。陳琳豪興筆若椽。陸機藻思才如綺。相逢儻問漢陰夫。爲言憔悴今若此。

翁夢鯉一首

夢鯉字希登。莆田人。嘉靖庚戌進士。除知縣。徵授戶部主事。謫潮州通判。遷惠州同知。擢廣東僉事。有戶部使吳。謫居等集。

蘭陔詩話。雨川詩情清婉。五律擅場。

早春麻城界河

客行初入楚。風日麗長亭。野草生荒岸。沙禽浴晚汀。溪流新雨活。樹帶去年青。轉憶西來道。孤鴻雪裏聽。

方攸躋一首

攸躋字君敬。莆田人。嘉靖庚戌進士。除南戶部主事。進員外。有草堂集。陳岩集。

懷吳明卿

一別河梁已隔旬。征衣遙逐楚山塵。平原渺渺愁孤客。芳草萋萋憶故人。鴻雁漸依彭蠡渚。桃花擬泛武陵津。才名汝亦吳興守。何處汀洲採白蘋。

黃謙一首

謙字亨夫。莆田人。嘉靖庚戌進士。官刑科給事中。有萬玉山藏稿十六卷。

蘭陔詩話。亨夫集中佳句。如珠海南浮驚鷗母。蒼梧西去弔湘君。亂後衣裘長作客。愁中風雨再逢君。玄菟名王修禹貢。白羊守吏獵春田。滄海總歸周白雉。水軍盡立漢朱旗。皆佳句也。

惶恐灘

宋文信國被俘過此

雙淚秦庭事忍言。南天不弔北來魂。灘聲似解孤臣意。日日奔流到海門。